

INUIT ATAQATIGIIT INATSISARTUNI



UKA2021/024

Ulloq 30. september 2021

Sofia Geisler

Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2021-meersoq (Attartornermi akiligassap akilerneqarfissaa, inissianik attartortittakkanik oqoqalersimasunik nalunaarsuineq kiisalu suliffimmut atatillugu inissianik oqoqarsimasunik innersuunneqartunik itigartitsisinnaatitaaneq)

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiisitaanermullu Naalackersuisoq)

Naalackersuisut inatsisissatut siunnersuutaat immikkoortoq 24 pillugu oqaaseqartussanngorama nuannarutigaa. Siunnersuut pineqartoq alloriarneruvoq, pisortat pigisaanni inissianik attartortikkanik attartortut pisinnaatitaaffeqalernissaannut.

2019-ip ukiaani siunnersuutit marluk inersuarmi saqqummiuppakka, Inatsisartunit tunuliaqutserneqarput maannakkullu inatsisissatut siunnersuutinngorlutik Naalackersuisunit saqqummiunneqarput.

Ullumikkumut atuuppoq inissianut pisortanit pigineqartunut oqummik ajornartorsiorfiusunut, imaluunniit siusinnerusukkut oqoqarsimasunut kingusinnerusukkut takkuteqqittumut inunnik isertertoqartarnera. Isumaqarpunga inatsisit atuuttut, inuit ataasiakkaat ilaqutariilluunniit peqqissusaat illersorniarlugit, oqummik ajornartorsiorortoqartillugu iliuuseqartariaqalersarneq eqqarsaatigalugu, naammaginangitsut. Inatsit naapertorlugu, inuit ataasiakkaat ilaqutariillumi, angerlarsimaffimmi peqqinnangitsumik silaannalimmi najugaqarnertik pissutigalugu,

INUIT ATAQATIGIIT INATSIARTUNI



peqqiillioraluttuinnarsinnaapput
innarlerneqarsinnaalluni.

ajornerpaaffianilu

peqqissusiat

Inissianik attartortut tassaalersarput ajornartorsiuteqaneranik taassumalu qanoq annertutigineranik uppernarsaasunngortinneqartartut, inatsisillu maanna atuuttut attartortut pisinnaatitaaffii tunuliaqutsinngilaat.

Inatsisissatut siunnersuut ataatsimiititaliamut susassaqartumut ingerlatinneqassasoq tunuliaqutserneqassasorlu soorunami neriuutigalugu tamatuma kingorna Naalakkersuisunut utertinneqareerluni piviusunngortinneqarneratigut qulakkeerneqassaaq attartortunngortussat aatsaavissuaq pisinnaatitaaffeqalernissaat inissiaq pillugu paasissutissanik pisariaqartunik tunineqarnissaminut – tassalu inissiaq siusinnerusukkut oqummik ajornartorsiuteqarsimanersoq, qanga tamanna pisimasoq kiisalu ajornartorsiut iliuuseqarfigineqarsimanersoq.

Naalakkersuisut inatsisissatut siunnersuutaanni pineqarpoq attartortumut ilisimatitsissuteqartussaalerneq iserterfigisassaq ukiut tallimat kingullit oqummik ajornartorsiuteqarsimappat paasissutissallu tunngavigalugit suliffimmut atatillugu inissamik neqeroorfigineqarnermut itigartitsisinnaatitaalernissaq utaqqisuni inissisimaffik annaanngikkaluarlugu.

Erseqqissaassutigissavara immikkoortoq 24-imi ilaanngimmat pisortat inissiaataannik suliffimmut attuumassuteqanngitsumik attartornissamut neqeroorfigineqartoq oquup ajornartorsiutaasimanagera innersuussutigalugu itigartitsinissamut periarfissinneqarnissaa. Taamaattumik allatut ajornartumik inissianut attartortittakkanut oqummik ajornartorsiuteqartunut attartortussat innersuunneqartariaqalersinnaanerat pinngitsoorniarlugu iliuuserisariaqagaq ataatsimiititaliami susassaqartumi isummerfigeqqullugu kaammattuissaagut.

INUIT ATAQATIGIIT INATSIARTUNI



Inissiat attartortittakkat amigaataaqaat, aammalu inissiareersut iluarsartuunneqarnissaannik atorfissaqartitsineq annertoorujussuuvoq. Inissiat attartortittakkat pisortat pigisaasa atorfissaqartinneqarnerat naapertorlugu sananeqarsimangillat. Tamanna ilisimaqqissaarpara. Aamma ilisimavara pisortat inissiaataannik attartortitsinermi attartortut pisinnaatitaaffeqalernissaat siunertaangitsumik kinguneqariataarsinnaamat, tassalu utaqqineq sivilunerulersinnaalluni utaqqisullu amerlanerulersinnaallutik.

Taamaakkaluartoq pingaaruteqarpoq attartortut pisinnaatitaaffiisa inatsimmut ilannguttariaqarnerat. Maannakkut iliuuseqanngikkutta oqummullu tunngasumik paasissutissamik pingaarutilimmik attartortussat aalajangernissaminnut toqqammavissaannik tuninissaat qulakkeernagu taava akuerissavarput inissianik attartortut peqqissusaasa innarlerneqarsinnaanerat.

Oqaatigilarput tamatta ilisimaqqissaaratsigu nunatsinni inissiat eqqarsaatigalugit tamakkiisumik suliassaqarmat, tamatumunngalu Inuit Ataqatigiit soorunami suleqataassaagut.

Taamatut oqaaseqarluta siunnersuutip tamarmiusup ataatsimiititaliamut susassaqartumut ingerlateqqinneqarnissaa innersuussutigissavarput.